



BERG NUUS

DIE BERGKLUB VAN SUID-AFRIKA AFDELING TYGERBERG TYGERBERG SECTION

POSBUS / PO Box 4572
7536 TYGERBERG

Maart 2012

BERG NUUS

Ontmoet die nuwe bestuur

Op 28 Januarie 2012 het die bergklub sy algemene jaar vergadering by Olive Glen gehou. Soos gewoonlik is daar weer oor die bestuur besin. Die volgende lede is tot die bestuur verkies.



Voorsitter: Johan Botha (*Links voor*);
Onder-voorsitter: Verwey Wiese (*Links agter*);
Sekretaresse: Erna Kritzinger (*middel voor*);
Tesourier: Hugo Kritzinger (*Regs agter*);
Lid vir stap: Reyno Buckle (*middel agter*);
Lid vir skakeling en nuusbrief: Terence Poultney (*regs voor*); Lid vir jeug en ledewerwing: Sandra Lombard (*afwesig*)

Berg-Informasie

Ons wil net graag al die lede herinner dat as 'n lid van die bergklub, kry julle afslag by Cape Union Mart en Capestorm.

Onthou ook dat die bergklub graag gaste welkom heet. Die betaling as n gas, wat saam stap, beloop R20 vir n dagstap en R50 vir n langer stap.

BERGSTORIES

KRAKADOUWPIEK VIA GROOT KOUPOORT

16 – 18 DESEMBER 2011

Ons groep van nege het Vrydagoggend vóór ses reeds in twee voertuie vertrek op hierdie uitdagende stap: ons in Carl en Sandra se Landrover en Charlie met sy gesin in hulle X-Trail.

By Clanwilliam het ons weggeswaai na Calvinia. Nadat ons oor die pragtige Pakhuispas gery het, het ons die afdraai na Wupperthal geneem. Die grondpad lei deur die interessante Biedouw-vallei (wat reeds goed bekend is vir sy blommeprag in die lente). Ongeveer 11km voor Wupperthal het ons weggeswaai na Heuningvlei, waar ons uiteindelik die voertuie parkeer het. Dis waar ons stap sou begin.

Ons rugsakke was redelik swaar gelaai en Freda was ook nie baie lank gelukkig met hulle tent op **haar** rug nie. Charlie se reëling was egter dat hy die tent sou oorneem sodra ons die berg begin klim. Na 'n kort middagete het ons dan ook ons tog teen Groot Koupoortpiek (1667m) hervat. Laatmiddag het ons op 'n plato net onder die piek kamp opgeslaan. Daarna het ons die laaste ent na die piek aangedurf en het Charlie ons die indrukwekkende afgronde, wat mens herinner aan die Slanghoekafgronde, gaan wys. Wat 'n ongelooflike gesig! Terug by die kamp was dit eers badtyd voordat ons almal ge-settle het

met ons sundowners en pasta-geregte. Rondom ons het die pragtigste rotsfigure teen die naglig afgesteek: 'n hadida, thar, "battle ship", ens.

Saterdag was weer 'n wolklose warm dag en het Charlie ons al onder die kranse via Chiselpiek en Cederpiek laat travers in die rigting van Krakadouw-piek. Middagete was by "Dipgat" – 'n verpligte "dip" in yskoue water onder 'n oorhangende rots - heerlijk! Die middagskof teen Krakadouwpiek uit was lank en warm. Ons beloning was egter groot toe Charlie ons die kampplek vir die aand wys: 'n ongelooflike kloof met groen gras, langs 'n waterstroom en die rotse wat aan die bokant feitlik toevou. Die naam "Panic-kloof" pas nie eintlik by hierdie idilliese toneel nie, maar het blykbaar sy oorsprong by die paniek om van die een kant van die skeur na die ander te spring.

Nadat ons 'n wyle gerus het, kon ons sonder die swaar rugsakke die omgewing verken. Charlie het ons opgewonde gaan wys waar "Langstraat" is: ons is in 'n "mynskag" af, deur 'n rotsopening waar die manne met die voller figure met moeite moes beur om deur te kom! Daarna het die roete deur 'n nou skeur gelei, waar ons soms kaalvoet deur yskoue water moes stap tot jou voete gepyn het, dan weer wydsbeen teen die kranse aan weerskante trap om deur die skeur te kom terwyl jy met jou elmboë jou moet stut - 'n ongelooflike ervaring!



Die volgende uitstappie was na die een baken van Krakadouwpiek (1710m) waar 'n wonderlike uitsig ons begroet het! 'n

Rotsklimmer het toe sopas ook by die baken aangekom, nadat hy die loodregte krans bestyg het. Sy vriend se rugsak wat daar bly hang het, het Sandra lank daarna nog bekommerd gehad!

Badtyd op Krakadouw is 'n ervaring op sy eie. Ons het elkeen ons eie poele gaan opsoek en kon in privaatheid die dag se sweet afwas met die ongelooflikste uitsigte.

Sundowners is langs 'n uitdrukwekkende afgrond geniet. Dis natuurlik altyd die hoogtepunt van die dag – wanneer jy skoongewas aan jou sjerrie / whisky kan teug en kan ontspan. Die aand het die Buckles ons almal oorgenooi vir 'n bring-en-"braai", want dit was hulle 28ste huweliksherdenking! Weereens is daar heerlijk saam kosgemaak en gekuier en het Freda ons verras met poeding vir die geleentheid. Die junior groep (Frances, Nicky en Henning) het ook lekker hulle eie kos gemaak en was deurgans 'n aanwys vir ons ouer garde.



Sondagoggend is ons eers weer almal na die ander baken van Krakadouwpiek (1745m) voordat ons met die terugtog begin het. Charlie het ons weereens deur allerhande doolgange en nou skeure gelei, waar ons telkens die rugsakke moes afhaal en aangee. Teetyd het ons onder 'n ou verwronge sederboom geniet, voordat ons die laaste ent berg-af aangedurf het. Onder op die vlakke kon ons eers heerlijk in 'n bergpoel afkoel, voordat ons kon afpak vir middagete in die dennebos.

Ons was ongeveer 3 nm terug by die voertuie: dankbaar om van die rugsakke en stewels

ontslae te raak! Daarna was dit die lang terugtog huis toe.

Nogmaals dankie aan Charlie vir 'n uiters interessante stap, vol opwinding en verrassings. Yvonne was destyds in trane by die gedagte dat sy nooit weer op Krakadouwpiek sal kom nie – ek wonder self of dit ons weer beskore sal wees



-Johan Benkenstein

Jan du Toitskloof 4-5 Feb 2012

Dit was seker een van die warmste naweke in Februarie hierdie jaar – so Jan du Toitskloof was die beste plek om te wees. Mens het sommer gou-gou kurkdroog geword na 'n swempie – sonder dat die son eers op jou skyn of 'n briesie oor jou waai.

Die kloof is baie toegegroei - maar gelukkig is daar nog taamlik klipstapels – en Altus en Renier het oues herstel en nuwes gepak soos ons gaan.

Swem-swem het ons by die oornag plek aangekom – en dadelik in die koelte gaan lê. Die aand was heerlijk koel.

Die volgende oggend het almal verbasend laat gelê (seker die vars lug..) – en toe stuk-stuk die omgewing rondom die 'Overhang' verken.

Ons is voor middag ete swem-swem terug motors toe. Jan du Toitskloof bly maar 'n wenner.

Mense wat saam was: Altus, Renier, Hugo, Alien, Hannes en Welma.

-Hannes Truter

Klubaand: 17 Feb 2012

Vrydagaand 17 Februarie het 15 lede en 6 gaste opgetrek na Gerrit en Erna se huis vir 'n heerlike bring- en braaigeselligheid en fotokykessie. Teen so sewe uur het die mense begin aankom en is die vuur aangesteek. Elkeen het gou vir hom 'n drinkdingetjie geskink en hulself tuis gemaak voor die televisieskerm om na Hugo Kritzinger se foto's te kyk van sy besoek aan Nepal in November 2011. Die foto's is deur 'n spesiale fotograaf geneem en hy het ongelukkig baie van die mense afgeneem en nie so baie van die natuurskoon nie. Dit was meer 'n rotsklimekspedisie en ons het ook baie van die rotsklimfoto's gesien. Hugo kon ons darem van al die interessante mense van oraloor vertel en wat hul nog alles gedoen het. Hy moes onder andere ook 'n aanbieding oor bergklim in Suid-Afrika hou en het hul getrakteer op foto's en vertellings oor die Sederberge. Hy het ook vir hul van ons Bergklubjoernale oorhandig.

Na die fotosessie het almal teruggekeer na die braaivleisvuur en het almal lekker saam gekuier. Die vleis is so stuk-stuk gebraai en almal het gesmul aan die heerlike slaai, potbrood en nagereg. Ja-nee, so 'n klubaand se kos is amper net so goed soos gaan uiteet, indien nie beter nie. Die aand is afgesluit met 'n lekker koppie koffie of tee voordat elkeen weer sy bed gaan opsoek het.

-Erna Kritzinger

Komende stappe

Rooikat Ravine 21 Maart 2012

Die roete begin by die Rycroft Hek in Kirstenbosch, van waar daar deur die tuin na die kontoerpad gestap word. Ons van die afdraai na die Rooikat-roete en op met Cecelia ridge na die sement-pad by die hutte. Die roete volg die pad aan die noordekant van die De Villiers dam oor die after-tafel na die Caveman's oorhang. Van daar is dit terug na die sementpad aan die weste kant van die Victoriadam tot by Nursery Ravine wat die pad na onder is. Die roete is ± 5 ure.

- Hannelize Lombard

Kromrivierhut 31Maart-01April 2012:

Die stap is spesifiek gereel vir ouers met (klein) kinders. Ons ontmoet mekaar Sat 31 Maart 2012 om 9am by Du Toitskloof 'nek'. Ons ry dan saam die kort stukkie (teerpad) na die (veilige) parkeerplek diep binne privaat grond. Vandaar is dit so 20-30min se maklike stap na die hut.

Die res van die dag verken ons die omgewing naby die hut en (hopelik) swem bietjie in die poel. Die aand braai en slaap in die hut.

Sondag gaan ons 'n kort entjie stap – en daarna terug na die motors.

Kostes: Volwasse lede = R20, Volwasse nie-lede = R40, kinders van lede = R10, kinders van nie-lede = R20

Bespreek asb vroegtydig by Hannes 082 4415413 of hannes@datasummit.co.za

- Hannes Truter

Die Panorama Roete 21 April 2012:

Die PANORAMA-ROETE in Jonkershoek, Stellenbosch word op die program aangedui as "matig moeilik – stappers moet fiks wees". Die rede daarvoor is dat Dwarsberg uitgeklim moet word, alvorens die paadjie meer gelyk word. Die roete begin by die Witbrug in die Jonkershoek reservaat. Daarvandaan is dit 'n redelike klim teen die hang van Katedraal Piek en uiteindelik teen Dwarsberg uit. Stappers word beloon met pragtige uitsigte na die Franschhoek-vallei en die see by Gordonsbaai. Die roete eindig by Swartboskloof. Ons beoog om so 08h30 in Jonkershoek te wees en behoort teen 17h00 weer terug by die motors te wees.

Belangstellendes kan Johann Benkenstein kontak by 084 619 3654.

- Johann Bekenstein

Dwarsstap Du Toitskloofberge 6 tot 9 April (Paasnaweek)

Ons beplan om vanaf die plaas Goudyn, naby Rawsonville, oor die berge te stap via Goudini Sneekop en Du Toitspiek na die BKSA hut in Du Toitskloofpas. Ons gaan drie nagte in die berg slaap. As jy wil saamgaan moet jy redelik fiks wees en nie bang wees vir hoogtes nie! (D4) Ons gaan darem nie rotsklim nie! Daar is feitlik geen paadjies nie en ons sal moet "bundu bash". Daar word aanbeveel dat jy 'n tent sal saamdra vir indien die weer teen ons draai. Reelings word nog met Cape Nature getref en gelde sal betaalbaar wees. Diegene wat saamgaan en wat 'n Wild Card het, moet hulle Wild Card nommers vir my laat weet anders moet julle ook toegang betaal. Bespreek asseblief so gou as moontlik. Tyd raak min. My tel. nr. 0219135751 en bedags by 0813637038.

-Charlie Buckle